

兄

牘

新

魚

貳
號

尺牘新鈔卷之三

國朝金谿周亮工元亮輯

周嬰

方叔莆田人初名中規
遠遊篇 卮言

與黃若木

陽輪不駐陰呂潛移靡草才萎寒梧遽下一歲之暑驚
其迅速百年之景知復幾何撫枕興哀難爲胸臆惟別
之後歡情頓絕何者景興曠世見望於方回威卿輕俠
貽譙於新息故或始素而終黜有前荃而後茅羽積輕
叢舟沈軸折猜嫌不釋肝鬲未剖夫漉澤濫淵則蛟龍

不遊探巢茂卵則長離增逝吾不能振鱗冥海奮翼蒼
梧徒以爲其嗟可去其謝可食托彼鰾穴嗅此鴟銜高
樓有僭梯之窘幽谷無遷喬之望夕景欲戢則應門納
鑰曉河未落則當關疾呼繫類支祁枯同貳負撫事一
鬱如何可忘但百六之厄未盡於此夫拔山之力不抵
鬼伯之催步天之智難藏將終之魄輒亦臨命而歔歔
彌留而泣下今疾在腸胃寢於骨髓夜不得臥晝惡聞
聲叢辰數筴告我不長日者發書其卦遇剝如使泰元
之師或信弘農之著無爽懼征西之命逢長順而凋零

黃門之算向靈牀而奄忽辭好卽惡命也如何嗟乎
州者骨骸之遽廬岱宗者精魄之區域去來常數蕞芥
何爲所恨壯圖行乖遠猶摧隕白馬誰赴朱生奚托洛
城之魂空思舊里齎亭之鬼終恚他鄉相去千里生死
長辭秉筆爲書涕淚橫集

重答黃光

字若木甫田人

塗遵武夷時與貴人遊焉靈谿清淺渟波鴻洞鏡流見
底沈鱗虛懸長蘿修竹映發芳洲鶴子雁雛回翔曲渚
聆青猿之傳響看白鷗之羣飛仰視側觀高峯隱天壘

巖虧日勢步仞而輒變形顧眄而靡記使人思渺渺而
獨徂氣飄飄而上厲散賞極娛一往忘反又何知蠻觸
之力爭蜂鷁之心競乎所之旣倦相與集乎萬年之宮
霄客蛇行而先路羽士鶴立而夾侍將饗遊者陳饋八
簋別客而進薜茗度賓而殊鷄鶩咸心傾于貴介視蔑
乎逢掖矣夫以人間寂莫之士山阿幽逸之人混儒墨
輕王侯猶復反側其情高下其手况乎燕雀之侶黜僧
爲心慕背揣乎熙涼驩咄易於旦暮滔滔皆是奚怪其
然哉

與陽春令黃兆修

前令侯君卽閩之昭武人聞其心含仁恕政尙勤卹據俗而動罔以毀譽櫻懷不貪爲寶靡以脂膏自潤柴桑旋反終乏三徑之資萊蕪去官猶却一斛之餽信吾鄉之宿德彼國之遺愛循良不孤儒雅係踵雖巫馬之代子賤各不相師而秀之之承虞公差得無事伏惟足下宏獎名教搜採前徽察摺紳之同辭餐民志之椒蘭遠使須昌路側式樹漢文之碑太丘城中方圖仲弓之像庶芳猷有述茂則長垂斯亦明質之令典樹風之雅化

矣屬因思至聊疏所知倘在妄塵勿以爲濶

謝譚海澄

費謂鉛山費無學也

明公視僕旣無親習之故非有平生之好若鳬乙翻翔
于天未夔虻蹠蹕于泥中本不關情何緣介意而僕又
干時寡術資身無策夙齒備嘗狼狽秋齡不免流離凍
餒所驅大業靡竟人非王粲托跡荊州交異長卿遨遊
功邑循躬知懼對客抱慙明公猶納之洪流收以大度
者豈不以費有把臂之雅故答其緩頰之殷哉僕賦命
多遭遭代仍蹇不圖此子奄化異物運斤之質旣逝因

針之契不追詎宜懷疇昔之意氣干尊嚴之恩澤乎明
公誼烈干霄襟期蓋世延陵寶劍心已許于徐君楚市
黃金諾不渝于季布雖僕栖遲宇下游泳波餘而衢尊
未憚于過斟宮鏡不疲于屢照敢忘大德以實鴻私所
恨宿草陳根懷哉曷旣素車白馬行矣將馳命駕之謀
思隨夢遠受屢之願道爲勢牽輒漚悃以辭歸爰告誠
而陳謝倘宿好不寔會面可期猶望元燕降睇重過故
壘青驪結乘或駙舊軒率爾睽攜自知悠忽瞻言墀側
不覺嚅嚅

陳際泰大士臨川人
已吾山房新訂集

復張天如

人居城中友生勦之不置如男子張君嗣附之疲倦欲
死奈何奈何相隔既遙不能如山間麋鹿常相聚每有
西風何能無嘆

寄韓求仲太史

肖弟方授書時卽知海內有求仲先生而深嗜其書
以爲天際真人旣而果以文字冠冕一時而地在必爭
讒者勝之此何預吾求仲事能遲十年宰相而不能奪

千秋之業與千秋之名且求仲卽不爲狀元卽不爲宰
相豈能減其毫末於此哉每與毛伯論此事動笑嘈嘈
者之無識也蘇子瞻千古文豪而李定舒亶輩猶承人
下竅而力毀之至謂買科徒作千古奇話而已矣

答閩中羅美中

弟無似誠不自意孤行一道宇宙之大翕然從之四海
之風爲之丕變弟文凡萬首行世者亦三千首貴鄉陳
仲謀貽書弟云海內得大士片紙隻字皆已掇巍科躋
膺仕兒孫滿天下而祖父母尙自留滯人間是天下極

尺牘新鈔卷之三
五
不平之事此意不知美中謂何耳豚兒孝威孝逸頗好
學能文俱可一日十餘藝天遲弟如此弟將以取償之
道寄諸兒而未敢必也然而老禿翁所藉以娛暮齒者
具是矣

甲戌登第後家報

威逸二兒可勉勵攻苦兄弟俱有雋才不宜自滿自弱
失上天所以予之之意與負老父所以望之之心尼兒
要曲體我懷好行其德學做好人勤儉雅慎助成老父
一箇賢鄉紳決不可忘其寒落忠厚之舊大言大語美

衣美食爲所不當爲六十六翁竟何所至思之思之

陳孝逸

少游臨川人

與羅杓菴

弟輩潦倒半生孟浪無似縱有古人古書百萬盤胸逢
人說之人誦道之亦有何名何實藉使下辟之上庸之
亦關何利何害賤兄弟內顧其聰明志力閉之深山足
有所修述成一家言徒以饑寒累之不獲遂願又聲色
毀譽不能頓割絕而無所事事秋閒姑且破釜沈舟持
三日糧爲射賊擒王計必不効而後杜門却軌發伏藏

滌筆硯張文設字椎古詈今操一時權衡而擬議其得失蓋亦有所長未可謂悲憂憤悶之所爲出也弟輩素惴爾爾對翁兄前正不敢欺隱耳

柬某

六千君子逐鹿圍中高才捷足何所蔑有又况目迷五色試官將不能與奇鬼爭權不肖亦年年送故人耳拙卷經大筆竄削數字頓易舊觀然輒以解元許孺子得毋驚殺三軍恐當場豪傑皆欲捫長者之舌矣笑謝不

答朱子強

譽言匝楮何寵之深也弟年紀寢大尙持數行文字從
少妙輩問妍媸於不必知己之人此正如老女嫁國奢
言不辱者強顏爾陳陳如新向良文耳豈謂眼來幾許
古矣東蕭伯玉大行
天眷幽人得縱意於文章山水雖雲中仙子未必有此
清福而况胸無丘壑者乎聞日月之記高與尺齊是當
播之天下使風流蘊藉者讀之孝逸雖無遠神尙饒孤
韻受書而行如載春浮以東令我時時見三莪先生於

湖頭深牧閒也

答劉孝若

王大將軍一旦開後閤驅出婢妾數十人並放之意氣何似常開平每戰必斬所幸美人頭然後臨士對敵千古英雄人物正詭不同而剛決則等吾曹丈夫於天下何所足係累乃復刺刺昵昵向兒女耳邊語耶來教獲我心矣

與陶堯生

一部十七史從何處說起今日對堯生正欲道一句不

得也遞歲來陵鋒蹈戈握蛇騎虎七尺之軀不必死第
之心則幾死者數矣孔北海所謂憂能傷人此子不復
永年者也

答管子敬

曹孟德壯歲雄飛功名兒子大慰平生東西門行顧復
云爾何也烈士暮年自悲短景正是貪戀功名兒子豈
豈且去之耳欲將婕妤妓人從銅雀臺上哭望西陵其
意殊可憫也奸雄人由此一念故事事不肯罷手所以
能殺天下尊見若何

寄李力負

今日接得道兄字真如古骨董我輩面肉不常作一處
合所可合者紙言墨語耳故交殆盡稍聞舊人同志相
守喜不成寐况道兄風義文章歲臻日上悉於躬菴舌
譜柴桑真不在潯陽矣弟憤嫉甚不死于兇亦死于恚
謝勦善哭而弟不能禰衡善罵而弟不敢意者出于哭
與罵之間騷鬱甚而佯狂佯狂甚而痼疾如是之人有
生理耶道兄筆墨有靈他日幸借一挽其恩甚大

與鄧止仲